

O'qish savodxonligi

III qism

3



novda
education

@ELEKTRON_DARSLIKBOT dan yuklab olindi.

U. B. Aydarova, N. K. Azizova

O'qish savodxonligi

3-sinf

III qism

Umumiy o'rta ta'lim maktablari uchun darslik

Ta'limni rivojlantirish markazi huzuridagi ilmiy-metodik
kengash tomonidan tavsiya etilgan.



Toshkent – 2023



@ELEKTRON_DARSLIKBOT dan yuklab olindi.

UO'K: 808.545(075.3)

BBK 74.202.5ya72

T-61

Aydarova U. B., Azizova N. K

O'qish savodxonligi. Umumiy o'rta ta'lim maktablarining 3-sinfi uchun darslik.
III qism. / U. Aydarova, N. Azizova, – Toshkent: "Novda Edutainment", 2023. – 80 b.

Taqrizchilar:

Sh. Y. Muslimova – Toshkent shahar 328-umumiy o'rta ta'lim maktabining oliy toifali boshlang'ich sinf o'qituvchisi;

M. M. Umarova – Toshkent shahar 222-umumiy o'rta ta'lim maktabining birinchi toifali boshlang'ich sinf o'qituvchisi.

Shartli belgilar:



**Savollarga
javob bering**



**Guruh bo'lib
ishlang**



**Diqqat bilan
o'qing**



Bu – qiziq!



Tinglang



**Topshiriqni
bajaring**



Uyga vazifa



Loyiha ishlari



Izohli lug'at

ISBN 978-9943-9715-9-2

© U. B. Aydarova, N. K. Azizova, M. E. Toirova

© "Novda Edutainment", 2023

@ELEKTRON_DARSLIKBOT dan yuklab olindi.

I bo'lim.

Tabiatni asraylik





Rasmni so'zlar bilan ifodalab, she'rni o'qing.



poklik,



tozalik asli,

Anglar buni har  nasli.

Shuni bilib qo'ygil, birodar,

Bir qultum



ga barobar.

She'r mazmuni yuzasidan fikringizni bildiring.



Tabiat zanjiri

Rivoyat

Tog'larning qor va muz bilan qoplangan bag'rida kunlardan bir kuni irmoq tug'ildi. Tug'ildi-yu, jildirab pastga intildi. Yo'lda o'ziga o'xshagan tiniq irmoqchalarni uchratib, ular bilan birlashib daryo hosil qildi. Daryo borgan sari kuch olib, yo'lida uchragan tosh va daraxtlarini ag'darib surib ketar edi. Mana shu yerda u birinchi bor insonni uchratdi.

Inson daryoga mehr va zavq bilan qaradi, uning suvlariga iliq qo'lini botirdi. Daryo uning qo'llarida mehrni, kuchni, irodani his qildi. Insonni zaminning egasi ekanini sezdi. Bundan keyin yo'lida uchragan har bir inson uning suvlaridan ichar yoki maza qilib

cho'milar edi. Daryo esa bundan xursand bo'lib, oldinga intilardi.

U yo'lida ildamlagan sari insonning kuchini his qilib borardi. Chunki odamzod uni tegirmonning g'ildiragini aylantirishga, boshqa o'zandan oqishiga majbur qilar, yo'lini to'g'onlar bilan to'sar edi. Shunday bo'lsa-da, daryo yo'lidagi barcha to'siqlarni yengib, oldinga intilardi.

Daryo o'z yo'lida borgan sari yomon odamlarni ko'proq uchrata boshlabdi. Ular o'z manfaatlari uchun daryoni ifloslantirar, unga har xil chiqindilarni tashlashar, daryo esa chiqindilarni chetga chiqarib, tobora oldinga intilar, o'simliklar va jonivorlarni xursand qilishga shoshilar edi.

Zavod va fabrikalarga to'la bo'lgan shahardan daryo butunlay kasal bo'lib chiqibdi. Uning suvlarining rangi o'zgargan, moylar bilan qorishgan, zararli moddalar bilan zaharlangan, tubi chiqindilarga to'la edi. Daryoning hayotdan umidi uzildi.

U juda sekinlik bilan shahardan chiqib, o'rmonga qarab oqdi. Yo'lida uchragan jonivorlar endi uning suvidan ichmas, odamlar unga jirkanib qarashar edi. Daryo shu zaylda oqib borar ekan, pokiza paytida birinchi bor uchratgan yo'lovchini uchratibdi.

Odam unga achingancha g'amgin qarab turardi. Daryo: "Yaxshiliklarim evaziga odamlar meni qanday ahvolga solganlarini ko'rib qo'y!" degandek uning oldida to'xtabdi.

Endi uning oqishga ham holi yo'q, yo'lini butunlay to'sib qo'ygan chiqindilarni yorib o'tishga ham majoli yetmas edi. Yo'lovchining unga rahmi kelibdi, qayerdandir bolalarni topib kelibdi. Ular uzun ilgaklar bilan daryoni chiqindilardan tozalay boshlashibdi.

Rahmdil kishi esa ketmon bilan daryo tubidagi og'ir chiqindilarni chiqarib ola boshlabdi.

Shunda daryo tug'ilgan va bolaligi o'tgan tog' bag'irlarini eslabdi. Bu odam va bolalarning unga yordam berishlariga ishonch paydo bo'libdi. Unda yana yashashga intilish hissi uyg'ondi, chunki u hali juda ko'plarga kerakligini bilar edi.



1. Daryo qanday paydo bo'ldi?
2. Daryo suvi qanday to'siqlarga duch keldi?
3. Insonlar suvga qanday munosabatda bo'ldilar?
4. Daryo suvining nima sababdan yashashga intilish hissi qayta uyg'ondi?
5. Ayting-chi, nima uchun rivoyat "Tabiat zanjiri" deb nomlangan? Siz rivoyatga yana qanday nom qo'ygan bo'lardingiz?



irmoq – katta daryoga quyiladigan daryo, soy, jilg'a
majol – mador



Rivoyat mazmuni asosida reja tuzing. Tuzgan rejangiz asosida rivoyatni qayta hikoya qiling.



Partadoshingizga rivoyatdan chiqargan xulosangizni ayting. Fikringizni taqqoslang. Nima uchun bunday xulosaga kelganingizni izohlang.

Rivoyat mazmuniga mos maqollar ayting.

Yodda tuting!

Suvni obi hayot – tiriklik suvi deb bejiz aytmaydilar. Suvsiz na tabiat yashnaydi, na biror jonzot yashay oladi. Tabiatning bebaho ne'mati bo'lmish suvni doimo toza saqlash, suv manbalarini muhofaza qilish, undan tejab-tergab foydalanish har bir kishining muqaddas burchidir.



Tuzli suvda jismlar chuchuk suvlardagiga qaraganda yaxshiroq suzadi. Yog'och suvdan yengil bo'lganligi uchun cho'kmaydi.



Rivoyatni o'qing va mazmunini so'zlab bering. Suvni tejash va ifloslantirmaslik chora-tadbirlarini ishlab chiqing.



Berilgan harflarning o'rnini o'zgartirib, bo'linga mos so'z hosil qiling.

K O G I L E O Y A

Hosil qilingan so'z haqida fikr bildiring va uning ishtirokida savollar tuzing. Shu so'zga ma'nodosh so'z toping.



“Tabiat – bebaho ne'mat”
audiomatnini diqqat bilan tinglang.



1



1. Tabiatni nima uchun onaga qiyoslab, ona tabiat deb ataymiz?
2. Siz “Tejog'likning ishi bejog'lik” maqolini qanday izohlaysiz?
3. Ayting-chi, insonlar tabiatga qanday ziyon yetkazyaptilar?
4. Har bir yetkazgan ozorlarimiz uchun tabiat bizni kechirarmikin?
5. Ekologiyaning buzilishi qanday oqibatlariga olib keladi, deb o'ylaysiz?
6. Bugungi kunda o'lkamiz tabiati qanday ahvolda?
7. Uni yaxshilash uchun nimalar qilishimiz mumkin?



Fikrlar mazmuni to'g'ri yoki noto'g'ri ekanini aniqlang.

1. Har tong saxovatli quyosh o'zining munavvar nurlari bilan bizni siylamaydi. Qushlarning mayin ovozi dilimizga xushnudlik ulashmaydi.
2. Aslida tabiat in'om etgan har qanday tortiq biz uchun mo'jiza, malham.
3. Ekologiyaning buzilishi nafaqat atrof-muhitga, balki insoniyatga ham ta'sir qiladi. Turli xil kasalliklarni keltirib chiqaradi.
4. Ona tabiatga bo'lgan hurmatsizlik bizga qimmatga tushadi. Bugungi kunda chiroyli xiyobonlarni ko'nglimiz tusab, u yerga oshiqamiz, lekin shunday chiroyli joylarni ham har xil chiqindilarga to'ldirib qaytamiz.
5. Bizning tabiat oldidagi burchimiz uni asrab-avaylashga o'z hissamizni qo'shish va boshqalarni ham bunga chaqirishdir.



Matn mazmunidan foydalanib, “Tabiat” soʻziga taʼrif bering. Ona tabiatni kimga oʻxshatish mumkinligini ayting.



Eshitgan matningiz yuzasidan savol tuzing va partadoshingiz bilan ushbu savolni muhokama qiling.

Xayolingizdagi eng goʻzal tabiat manzarasini soʻzlar bilan tasvirlab, matn yarating. Bu manzarada nimalar bor?

Yodda tuting!

Oʻzbekistonimiz qorli togʻlari-yu yam-yashil adirlari, zilol suvlari-yu musaffo havosi, oltin tuprogʻi-yu shirin-shakar mevalari bilan mashhur yurtdir.

Bolalar, ona zaminni asraylik, eʼzozlaylik! Koʻchalarimiz ozoda, serdaraxt, soya-salqin boʻlishiga hissa qoʻshaylik! Tabiatning inʼomlaridan oqilona foydalanish, oʻsimlik va hayvonot dunyosini muhofaza qilish hammamizning burchimizdir!



“Tabiat neʼmatlari” mavzusida kichik matn tuzing.



Muallif o'zi haqida:

1962-yili Toshkent shahrining Labzak dahasida tug'ilganman.

Onam shoir Hamid Olimjonning "Oygul bilan Baxtiyor" she'riy ertagini yoddan aytib bersalar, jon qulog'im bilan tinglardim.

Ilk mashqlarimni onam ko'rib berganlar. Lekin to katta bo'lmagunimcha gazeta va jurnallarda chop etilmagan.



Nega?..

Zahro Hasanova

Tahririyatga ishga kelayotib, avtobus bekatida pista chaqib o'tirgan o'quvchilarga ko'zim tushdi. Ularning oyog'i osti atrofdagilarning "havasini keltiradigan" darajada ivirsib bo'lgan edi. 12-14 yoshlardagi uch nafar o'quvchi bolaning ust-boshi binoyidek, yonida papkasi, qo'lida esa qadoqlangan qog'oz paketdagi pista. Ular pista po'chog'ini yerga tashlab atrofni to'zitayotganlari xayoliga ham kelmayotgani yuz-ko'zidan, o'zini tutishidan shundoqqina sezilib turardi. Nega?.. Kechagina shu bekatni tuman obodonlashtirish xizmatidagi farroshlar supurib-sidirib ketishayotganini ko'rib, quvongandim. Oradan bir kun o'tib, bekat yana pista po'chog'i-yu, qog'oz va boshqa chiqindilarga liq to'libdi. Jahlim chiqdi:

– Mana shu pista po‘chog‘ini biror qog‘ozga o‘rab, huv anavi – 10 metr naridagi axlat qutiga olib borib tashlasangiz bo‘ladi-ku, bolalarim, – dedim ularga.

Bolalar bir-birlariga qarab jim qolishdi.

– Har kuni shu bekatdan ota-onalaringiz, qo‘shnilaringiz, mahalla ahli va tengdoshlaringiz o‘qishga, ishga ketadilar. Bu ahvolni ko‘rib, hammaning ta‘bi xira tortib, kayfiyati buziladi-ku.

Bolalardan biri meni tushundi, shekilli, qo‘lidagi pistasini papkasiga solib, o‘rtoqlariga qaradi va “Yig‘ishtiringlar”, dedi. O‘rtoqlari darrov uning aytganini qilishdi...

Odamzod – tabiatning bir bo‘lagi. Tabiat xushhavo, atrof ozoda va go‘zal bo‘lsa, odamzod ham ana shu go‘zallik bag‘rida sog‘lom va ko‘rkam yashaydi. Tabiatning rang-barang jilvasidan quvonadi, kayfiyat oladi, ruhi tetiklashadi. Bularning hammasi kishiga ajib kuch-g‘ayrat bag‘ishlaydi. Ruhi tetik, sog‘lom odam esa yaxshi o‘qiydi, ezgu ishlarga qo‘l uradi, tog‘ni talqon qilishga qodir, bunyodkor inson bo‘lib voyaga yetadi. Biz esa sizlarni kelgusida har tomonlama sog‘lom va barkamol bo‘lib ulg‘ayishingizni istaymiz.





1. Hikoya kimning nomidan aytilgan?
2. Hikoyadagi voqeaga o'z munosabatingizni bildiring.
3. Hikoya qahramonlariga ta'rif bering.
4. "Odamzod – tabiatning bir bo'lagi" deganda nimani tushunasiz?
5. Ayting-chi, hikoyadan ibrat olish mumkin bo'lgan qanday holat bor?



tahririyat – qo'lyozma matnlari ustida ishlab, nashrga tayyorlab berish bo'limi
ivirsib – betartib holga kelgan
jilva – tovlanish, tuslanish



Quyidagi iboralar qatnashgan gaplarni topib o'qing va mazmunini izohlang.

1. *Tog'ni talqon qilish* 2. *Ta'bi xira*

Hikoyadagi ikkinchi gapni o'qing va fikringizni bildiring.

Hikoya mazmuniga mos reja tuzing.



Hikoyadagi so'zlar ishtirokida so'zlar zanjirini hosil qiling.

Namuna: pista-axlat



Hikoyani o'qing. Shaxsini o'zgartirib, qayta so'zlab bering.



Hamza Imonberdiyev 1954-yil 21-dekabrda qo'shni Qozog'iston Respublikasining Chimkent viloyatiga qarashli Suzoq qishlog'ida dehqon oilasida tug'ildi. Shoir uzoq yillar "Tong yulduzi" gazetasining adabiyot bo'limini boshqardi. Hamza Imonberdiyev "Cho'lpon" nashriyotida muharrir vazifasida xizmat qildi. Uning "Quvnoqlar quvonchi", "Shokoladxo'rlar", "G'aroyib pufak", "Kulgi shaharchasi" singari o'ndan ortiq kitoblari nashr etildi.



O'q

Hamza Imonberdiyev

Nafasin bir dam rostlab,
Uchib ketdi kamon o'q.
Yon-veriga boqmasdan
Uchib borar hamon o'q.

Quyosh ko'kda qotdi tosh,
Nafasini yutgancha.
Gullar ma'yus egdi bosh,
O'zligin unutgancha.

O'yga botib borar u,
Qora ajal qo'lida.
Kelib qoldi ro'baro',
Ona Jayron yo'lida.

Qochar Jayron quyunday,
Tuyog'idan chaqnar o't.
– Jon O'q, tegma, uyimda
Kutar bolam, **ko'zi to'rt!**

O'q voz kechib nishondan,
O'tib ketdi bir yondan.

Hamon uchib borar u,
Qora ajal qo'lida.
Kelib qoldi ro'baro'
Keksa Chinor yo'lida.

– Hoy, ko'zingga qara-da, –
Titrab dodladi Chinor.
– Bag'rimdagi inlarda
Axir, polaponlar bor.

O'q voz kechib nishondan,
O'tib ketar bir yondan.

Noilojlikdan oxir
Sabr kosasi to'lib,
Shahd bilan pastga
sho'ng'ir,
Yerga sanchilmoq bo'lib.

Titrab ketar Yer nogoh:
– Sensiz ham, ey masxara,

Yurak-bag'rim o'chmas
dog',
Yuz mingta bitmas yara.
Ilojsiz, nochor qolib,
Yo'lda davom etar O'q.
O'qligidan ming nolib,
Olislarga ketar O'q.

Yer dumaloq emasmi,
Holdan toygan payti u.
Buni qarangki, asli
Uchgan joyga qaytdi u.

Xuddi shu payt **shum**
kishi

Boshqa o'qni joylardi.
Alam-la qayrab tishin,
Kimlarnidir poylardi.

U quloq ham qoqmadi
Ajalning sharpasiga.
Uchib kelib sanchildi,
O'q shundoq orqasiga...





1. Kamon o'q yo'lida ilk bor nimaga duch keldi?
2. O'q nima uchun kekxa Chinorga, Yerga sanchilishdan voz kechdi?
3. U asli uchgan joyiga qanday qilib qaytib keldi?
4. Siz she'rdagi o'qni nimaga o'xshatdingiz? Fikringizni izohlang.
5. Sizningcha, nima uchun she'r aynan shu bo'limda berilgan?
6. She'rda qanday g'oya ifodalanyapti?



ro'baro' – qarama-qarshi kelish



She'rda ishtirok etgan qahramonlarni aniqlang.
She'r qahramonlarining so'zlari berilgan misralarni o'qing. Quyidagi satrlarni izohlang:

*Yurak-bag'rim o'chmas dog',
Yuz mingta bitmas yara.*

She'rda ajratilgan so'zlarning ma'nosini tushuntiring.
She'rdagi o'qqa ta'rif bering.
Berilgan savollarni she'r mazmuniga mos holda to'ldirib tuzing.

*Agar ... bo'lsa nima bo'ladi?
Tasavvur qilaylik...*



She'rni ifodaii o'qing. She'rdan olgan taassurotingizni yozing.



Yurtimizda o'suvchi o'simlik turlariga ikkitadan misol ayting.

daraxt

buta

o't

O'simliklarning foydasi haqida fikringizni ayting.




Daraxtlar – tabiat mo'jizasi

Jannatmakon yurtimizning tabiati betakror, o'simlik dunyosi boy. Bunda har bir daraxtning o'ziga xos xislati, xosiyati bor. Deylik, xalqimiz chinorni umrboqiy daraxt deb biladi. Yurtimizning turli joylarida ming yillik chinorlar bor. Ular nodir tarixiy yodgorlik. Masalan, Surxondaryoning Sayrob qishlog'idagi ko'hna chinor ichida bir vaqtlar maktab bo'lgan.



Mamlakatimiz tarixida archa daraxtining bir qancha turlari uchraydi. Tog'larda mahalliy aholi "Cho'ponarcha" deb ataydigan har bir archa – bir quduq qiymatiga teng. Qishda qorni, yozda namlikni saqlaydi. Bunday archalar juda nodir bo'lib, nihoyatda qadrlanadi.



Surxondaryo viloyati Sariosiyo tumanida tatum (tuz) daraxti o'sadi. Mahalliy aholi tuz daraxti deb ataydigan tabiatning bu ne'mati ajabtovur xislatga ega. Uning mevasini bemalol oziq-ovqatga tuz o'rnida ishlatish mumkin. Dunyoning hech bir joyida uchramaydigan bu "tuz daraxti" mamlakatimizning boshqa biror hududida o'smasligi kishini lol qoldiradi.

Tug'dona daraxti haqida eshitganmisiz? Tug' – yalov, bayroq, dona esa – daraxt ma'nosini bildiradi. Lekin nima uchun tug'dona, ya'ni bayroq daraxt deb nomlanishi ko'pchiligimizga noma'lum.

Rivoyat qilishlaricha, tog' qo'ynida joylashgan mamlakatlarning biriga yov yurish qilibdi. Xabarchilar barcha qishloq, ovullarni xatardan ogoh etib, jangga chorlaydi. Odamlar shu atrofda o'sadigan daraxtlardan kaltak va cho'qmor yasab, Vatan uchun hayot-mamot jangiga kiradi. Hatto qariyalar va yosh bolalar ham qo'llarida daraxt novdalarini bayroq kabi boshlari uzra baland ko'tarib, hayqirganlaricha, jangchilariga madad berishadi. Birgalashib yovni butunlay mag'lub etgan el og'ir kunlarida madad bo'lgan daraxtni e'zozlab, tug'dona – bayroq daraxt deb ataydi. Tug'dona tosh kabi mustahkam daraxt. U toshni yorib chiqib o'sadi. Tug'dona yog'ochidan yo'nib yasalgan do'mbiraning toza va jarangdor tovushi odamlarga kuch, g'ayrat, shijoat, ko'ngillariga orom bag'ishlagan.

("Bolalar adabiyoti" jurnalidan)



1. Matnda qanday daraxt turlari tilga olingan?
2. Surxondaryo viloyatida o'sadigan daraxtlar haqida nimalarni bilib oldingiz?
3. Tug'dona daraxti haqidagi rivoyatdan qanday xulosa chiqardingiz?
4. Tabiatda daraxtlarning kamayib ketishiga nimalar sabab bo'lyapti, deb hisoblaysiz?



yo'nmoq – biror narsani yasash maqsadida kesmoq
ajabtovur – ajablantiradigan
cho'qmor – to'qmoq shaklidagi qadimiy jang quroli



“Shaxmat taxtasi” mashqi. Shifrlangan so'zlarni toping.

| | | | | |
|---|----|---|---|----|
| 4 | ch | i | d | g' |
| 3 | k | a | e | u |
| 2 | n | x | r | o |
| 1 | q | y | m | t |
| | A | B | D | E |

1. B3, D2, A4, B3
2. A4, B4, A2, E2, D2
3. E1, E3, E4, D4, E2, A2, B3
4. E1, B3, E1, E3, D1
5. A1, B3, B1, B4, A2
6. A1, B3, B1, D2, B3, E4, E2, A1
7. E1, D3, D2, B3, A3



Matnni o'qing va mazmunini so'zlab bering.
 Daraxtlar haqida qiziqarli ma'lumotlar to'plang va uni do'stlaringizga aytib bering.



Rauf Tolib 1946-yilda Toshkent shahrida tugʻilgan. Shoirning “Ona yurt”, “Eshitmadim demanglar”, “Yurt mehri”, “Osmon bogʻ”, “Mirjalol nega lol?”, “Sehrgar doʻstim bor”, “Qiziq tomosha”, “Hamma hayron”, “Jirafaning boʻyni nega uzun?” kabi oʻndan ortiq kitoblari nashr etilgan.



Aralashtirib berilgan harflardan soʻzlar hosil qilsangiz, yurtimizdagi koʻllar nomini bilib olasiz.

daroʻlayk

samiqarish

sanaroy



Orolim

Rauf Tolib

– Ey bolajon, bolajon,
Qanday oʻylar dilingda?
Oʻltiribsan parishon,
Bahor yashnar elingda.
– Mehmon gʻozlarim, koʻring,
Tabiat topdi zavol.
Suvsiz qolib daryolar,
Qurib bormoqda Orol.

– Ey, bolajon, bolajon,
Qo'y, o'rtanma alamda.
Biz-la yurt kez,
Yo'llar osh,
Dengiz ko'p-ku, olamda?...
– Dengizlar ko'p,
Ko'llar ko'p,
Olam kengdir, kattadir.
Men-chun yurtim yagona,
Ona Orol bittadir.



1. She'r kimning tilidan aytilgan?
2. Sizningcha, bola nima haqida o'ylar edi?
3. Orol dengizining qurishiga nima sabab bo'lgan deb hisoblaysiz?
4. "Tabiat topdi zavol" deganda nimani tushundingiz?
5. She'rdagi ushbu satrlar nimani anglatishi haqida o'ylab ko'ring:

*Men-chun yurtim yagona,
Ona Orol bittadir.*



parishon – bir yerga to'planmagan, tarqoq
zavol – halokatga yuz tutgan



She'rni rollarga bo'lib o'qing.
She'r qahramonlariga o'z munosabatingizni bildiring.
Qofiyadosh so'zlarni aniqlang.



Bilasizmi, Orol dengizi aslida ko'ldir. U qadimdan dengiz kabi katta, suvi sho'r va taxir bo'lgani uchun dengiz deb atalgan. Hozir esa qurib, bir nechta ko'llarga ajralgan. Orol dengizi suvining keskin kamayishi shamol ta'sirida yon-atrofga tuz tarqalishiga olib keldi. Natijada, yer sho'rlanishi kabi muammolar avj oldi. Odamlarning salomatligiga salbiy ta'sir ko'rsatdi.



O'qiganlaringiz asosida Orol haqida

- 3 ta fikr ayting;
- 2 ta savol tuzing.



She'rni ifodali yod oling.



Rasmlarni ifodalovchi so'zlarni
bir-biriga bog'lab, bo'lim
mazmuniga mos gaplar tuzing.



Tabib ko'klam

Rauf Tolib

– Ayting, ona daraxtga
Bolta urar kim?
Qandoq?

– Umi, bir nihol ekib
Ko'kartirmagan mutloq.

– Kimdir go'zal gulzorni
Qilibdi rosa payhon.

– Chunki u gul husniga
Boqmagan-da, lol, hayron.

– Sho'x, sayroqi qushlarga
Kim u ko'targan miltiq?

– U qush tilin anglamas,
Unga begona qo'shiq.

– Ona yer bag'ri
kuygan,
Tabiatda qora dog'.

Ayting, yashil olamga
O't qo'yar qaysi ahmoq?

– Tabiatni, tog'larni,
Eh, vayron etar Odam...

Har yili yaralarin
Davolar tabib ko'klam.



1. She'r nima haqida ekan?
2. Sizningcha, qanday insonlar tabiatga ziyon yetkazadi?
3. Nima uchun she'r "Tabib ko'klam" deb nomlangan?
4. Siz she'rni qanday nomlagan bo'lardingiz?
5. O'ylab ko'ring, ko'klam qanday qilib tabiblik qila oladi?
6. She'rda ibrat bo'la oladigan qanday jumlar bor?



payhon – yo'q qilmoq
mutloq – mutlaqo



She'rni rollarga bo'lib o'qing.
 Quyidagi rasmlarni ifodalovchi so'zlar qatnashgan misralarni topib o'qing.



She'rni yod oling. She'r mazmuniga mos matn tuzing.



Berilgan maqol va hikmatli so'zlarni o'qing. Ular bo'limdagi qaysi asarga mos keladi?

Suvga tupurma, suvsiz qolasan.

Har kim o'z yerini gulzor qilsa, butun
alam gulga burkanadi.

Kishining qanchalik sog'lom yoki nosog'lom
bo'lishi havo, iqlim va yashash tarziga bog'liq.

Insonning do'stlari – sof havo,
sovuq suv, badantarbiya.



Tushirib qoldirilgan so'zlarni o'z o'rniga qo'yib,
she'rni o'qing.



G'alati ovchi

Rauf Tolib

o'rtoq

- Ha, do'stim, dimog'ing chog'.
- Ovdan qaytdim,
- Dadang bilan sen yana
Ovlabsan-da, bedana?
- Yo'q.

baliq

qopqon

– To'qayga qo'yib ...
Ovladingmi yo quyon?

– Yo'q.

– Yo qushni olib mo'ljal
Qildingmi uni ...?

– Yo'q.

– Ha, topdim, soydan ...
Tutib kelgansan, aniq.

– Yo'q.

– Nima ovlading, voy-vuy,
O'zing shartta ayt, qo'y.

– Men ...larning chiroyin,
... kuyin ovladim.

Tushunolmay hech gapga
Do'stin boshi g'ovladi.

Qushlar


o'lja

tog'



Shifrlangan harflarni aniqlang va so'zlarni o'qing.
Topgan so'zlaringiz ishtirokida matn tuzing.

| | | |
|---|---|---|
| T | A | S |
| V | L | B |
| I | G | U |



“Tabiatni asrash burchimiz” mavzusida tavsiyalar
ishlab chiqing.

II bo'lim.

Bola boshidan





Ahmad al-Fargʻoniy Fargʻona vodiysining Qubo (hozirgi Quva) shahrida dunyoga keldi. Uning toʻliq ismi Abul Abbas Ahmad ibn Muhammad ibn Kasir al-Fargʻoniy. Yosh, qobiliyatli va tirishqoq Ahmad dastlab Quboda, soʻng oʻsha davrning madaniy markazlaridan boʻlgan Axxi shahrida anʻanaviy fanlardan taʼlim olib, olim boʻlib yetishdi.



Porloq yulduz

Tamila Qosimova

Alloma Ahmad al-Fargʻoniy endigina usturlobni Mushtariy yulduziga toʻgʻrilagan edilar, shogirdi oʻgʻilchasi bilan kelib qoldi. Alloma bir soniya bolaga nazar soldilar. Bola yoqimtoy, istarali edi. Porloq koʻzlarini allomaga tikib turardi. Uning maʼnoli, tim qora koʻzlari allomaga yoqib qoldi. Bola koʻksiga qoʻlini qoʻyib, egilib salom berdi.

– Va alaykum assalom, boʻtam, ismingiz nadur?!

– Ismim Ahmaddur.

– Barokallo, otdosh ekanmiz.

Bolakayning koʻzlari porlab:

– Hazrat alloma, meni kichik Ahmad deya qoling, – dedi biroz uyilib.

Alloma bolakayning dadilligidan quvondi va usturlobga yaqin olib keldi.

– Qani, kichik Ahmad, yaqinroq keling-chi, biz hozir yulduzlar sayrini tomosha qilamiz.

Kichik Ahmad sevinib ketdi. Chunki koʻpdan buyon u otasidan yulduzlarni koʻrsatishni iltimos qilib yurar edi. Ammo otasi: “Ulugʻ allomaning ishiga xalal berasan”, – deb uni olib kelmasdi. Bugun allomaning chehrasidagi nurli tabassumni koʻrib, ota-bola yayrab ketishdi. Kichik Ahmad usturlob orqali samodagi minglab yulduzlarni tomosha qilardi. Yulduzlar jimir-

jimir qilgani sari kichik Ahmadning hayrati osha bordi. Alloma usturlobni yulduzga to'g'rilab:

– Mana, bunisi sizning yulduzingiz. Boqing, mitti bo'lsa-da, yoniq, porloqdir, – dedilar.

Kichik Ahmad bu kichik yulduzni uzoq tomosha qildi. So'ng usturlobdan ko'zini olib:

– Chindan ham bu mening yulduzimmi? Sizga tashakkur, hazrat alloma! – dedi.

Kichik Ahmad shunday sevindiki, hatto otasi malla chakmon bilan qizil etikcha olib berganda ham bunchalik sevinmagan edi. Ota-bola quvonchlarga to'lib uyga qaytdilar.

Kichik Ahmad tez-tez otasi bilan kelib, o'z yulduzini tomosha qilib ketardi. Uni ishga ko'milib o'tirgan alloma xush kutib olar va mehr bilan kuzatib qolardi.

Biroq bir haftagacha kichik Ahmaddan ham, allomaning shogirdidan ham darak bo'lmay qoldi. Bundan alloma qattiq tashvishga tushdilar. Ma'lum bo'lishicha, kichik Ahmad betob bo'lib qolgan ekan. Alloma o'sha kuniyoq kichik Ahmadni ko'rgani bordilar. U to'shakda rangi za'faron, behol yotardi. Alloma o'zlari bilan olib kelgan dorilardan ichirdilar.

So'ng kichik Ahmadga:

– Yulduzlar sizga salom yo'lladilar, – dedilar. Kichik Ahmad yostiqlardan boshini ko'tarib so'radi:

– Hazrati alloma, yulduzlar ham so'yilaydirlarmi?

– Albatta. Ular bilan so'zlashishni sizga o'rgaturmen, – dedilar.

Kichik Ahmad tuzalib ketdi. U yulduzlar bilan so'zlashish uchun buyuk alloma Ahmad al-Farg'oniyni huzuriga yo'l oldi...



1. Alloma Ahmad al-Farg'oni kim edi?
2. Uning huzuriga kimlar tashrif buyurishdi?
3. Kichik Ahmad nimadan sevinib ketdi?
4. Ahmad al-Farg'oni nima uchun shogirdining uyiga tashrif buyurdi?



usturlob – yulduzlarning osmonda joylashish o'rnini aniqlovchi asbob

chakmon – ustki kiyim turi

za'faron – sarg'ish rang



Odam tunda oddiy ko'z bilan osmonga tikilib, ko'pi bilan uch ming yulduzni ko'ra oladi. Lekin hatto kichkina teleskoplar yordamida millionlab yulduzni sanash mumkin. Yer osmonida ko'rinadigan eng yorug' yulduzlarni qadimgi olimlar yulduzlar turkumiga birlashtirishgan va ularga afsonaviy nomlar berishgan. Katta ayiq, Kassiopeya, Aravakash va boshqa yulduzlar turkumlari shu tarzda paydo bo'lgan.



Hikoyani o'qib, qayta so'zlab bering. Yulduzlar haqida qiziqarli ma'lumotlar toping.



Abu Rayhon Beruniy
Xorazmning qadimiy poytaxti
Kot (Kat) shahrida tug'ilgan.
Yoshligidanoq ilm-fanga juda
qiziqqan. Ayniqsa, matematika,
astronomiya, geografiya va tabiiyot
fanlariga doir ko'p risolalarni o'qib
o'rgangan. Shu bilan birga qadimgi
xorazm tilini, turkiy, fors va arab
tillarini puxta o'rganib olgan. U 75 yil umr ko'rib, shu
davr ichida ko'p kitob va risolalar yaratgan.



Abu Rayhon Beruniy

Pirmat Shermuhammedov

Bugun juma. Havo ochiq, osmon artilgan shisha
singari tiniq, musaffo. Quyosh nayza bo'yi ko'tarilgan.
Yigirma besh yoshlar chamasidagi o'rta bo'yli,
bug'doyrang, xushqomat Abu Nasr bugun-erta
sahardanoq o'z yordamchilari bilan qishloq chetidagi
tepalik ustida usturlob o'rnatish bilan mashg'ul.

Bir mahal uning yoniga qoramag'iz, bo'z ko'ylak,
bo'z ishton kiygan oyoq yalang bola kelib o'tirdi.
Uning yuzi, ko'zi va chehrasida chuqur hayajon
shundoqqina sezilib turardi.

– Yana keldingmi? – deydi Abu Nasr uni erkalagan
ovozda.

- Keldim, – deydi bola hayajonini yashirmay.
- Menga yordamlashib yuborasanmi?
- Albatta! – Bola dadillanib unga tomon suriladi. –

Bu nima ustoz?

- Usturlob.
- Usturlob deysizmi?
- Men bu asbob bilan Quyosh va yulduzlar harakatini kuzataman.
- Qanday qilib kuzatasiz? Kunduzi osmonda hech narsa ko‘rinmaydi-ku!
- Tunda kuzataman-da, – deydi Abu Nasr jilmayib.
- Men ham kuzatsam bo‘ladimi?
- Sen hali yoshlik qilasan. Katta bo‘lganingda hammasini bilib olasan.
- Hozir bilgim kelyapti, ustoz.
- Isming nima?
- Muhammad.
- Kimning o‘g‘li-san?
- Otamning ismi Ahmad.
- O‘qish, yozishni bilasanmi?
- Bilaman.
- Nimalarga qiziqasan?
- Har tunda osmon to‘la yulduzlarni kuzataman. Biram yulduzlar bilan gaplashgim keladiki. Siz-chi? Siz yulduzlarning tilini bilasizmi?
- Ha. Tushunaman.
- Menga ham o‘rgating.
- O‘rgataman.

- Aldamaysizmi?
- Aldamayman. Ammo bir shartim bor.
- Ayting.
- Men bilan shaharga ketasan.
- Xo'p. Faqat ota-onam rozi bo'larmikin?
- Otangga o'zim tushuntiraman.

Shu kuni kechqurun Abu Nasr vaqt topib, qishloq chekkasidagi ko'rimsiz bir hovliga kirib bordi...



1. Asar qahramonlari kimlar?
2. Usturlab haqida nima deya olasiz?
3. Ahmad nimaga qiziqar ekan?
4. Sizning qanday qiziqishlaringiz bor?



qoramag'iz – qorachadan kelgan



Hikoyadan Abu Nasr va Muhammadning suhbatini o'qing.

Qahramonlarning tashqi ko'rinishi tasvirlangan gaplarni topib o'qing.

Hikoya qahramonlariga ta'rif bering.

"Nayza bo'yi" iborasini izohlang.

Hikoya mazmuniga mos reja tuzing.

Hikoyadagi voqealar rivojini davom ettiring.



Hikoyani rollarga bo'lib o'qing.



Maqolni izohlang.

Har mevaning po'chog'i bor,
Har so'zning o'lchovi bor.



Va'da

Xurshid Davron

Sohibqiron Amir Temur Ko'ragoniyning nabirasi Mirzo Ulug'bek bolaligidan boshlab zakovat va farosat sohibi bo'lganlar. U kishi ko'p bilimlarni egallab, ustozlarni benihoya hurmat qiluvchi, ustozlari ham uni sevguvchi edilar.



Mirzo Ulug'bek yosh bola paytida Amir Temur Rum mulkidan olib kelgan bir donishmand unga saboq bergan ekan. Rumlik donishmandning bir odati bor ekan: agar shogirdi biror jumlani yanglish o'qisa yo boshqa bir xatoga yo'l qo'ysa, boshini ko'tarib unga qarab qo'yar ekan.

Bir kuni Mirzo Ulug'bek ustozini oldida bir kitob o'qir edi. Kitobda "Bo'lgan, uddasidan chiqmagan narsangizni nega va'da qilasiz?" degan jumlaning o'qigach, ustoz boshini ko'tarib, unga bir qarab qo'yibdi.

Ulug'bek Mirzo: "Ehtimol, yanglish o'qigan bo'lsam kerak", deb jumlaning diqqat bilan qaytadan o'qibdi. Ammo ustoz bu gal ham boshini ko'tarib, unga qarab qo'yibdi.

Mirzo Ulug'bek saboqdan keyin bobosi yoniga kelib:

– Bobojon, ustozimga biror narsa va'da qilgan bo'lsangiz, darhol va'dangizga vafo qiling, – deb bo'lgan voqeaning Amir Temurga aytib beribdi. Amir Temur nabirasining hikoyasini eshitib:

– Ustozing mendan Rumda qolib ketgan kutubxonasini olib kelishga odam yuborishimni so'ragan, "Bu kitoblar menga emas, nabirangizga kerakdur", – degan edi. Men odam yuborishga va'da qilgan edim, ammo yodimdan chiqib qolgan edi, – debdi u nabirasining zukkoligidan mamnun bo'lib. So'ng rumlik donishmandga bergan va'dasini darhol bajo keltirishga kirishibdi.



1. Asarni o'qish jarayonida ko'z oldingizda qanday holat gavdalandi? Donishmand qayerlik edi?
2. Donishmandning qanday odati bor ekan?
3. "*Uddasidan chiqmagan narsangizni nega va'da qilasiz?*" jumlasini qanday tushundingiz?
4. Mirzo Ulug'bek bo'lib o'tgan voqeani kimga so'zlab berdi?
5. Asardan qanday xulosa chiqardingiz?



yanglish – xato

zakovat – aql

uddasidan kelmoq – bajara olmoq

darhol – tezda



- Asardan Amir Temur va Mirzo Ulug'bekning suhbatini o'qing.
- Mirzo Ulug'bek haqida aytilgan gaplarni topib o'qing.
- Hikoya qahramoniga ta'rif bering.
- Hikoya mazmuniga mos reja tuzing.
- O'rganilgan mavzu yuzasidan fikringizni ayting hamda savollar tuzing.



Hikoyani o'qing. Mazmunini so'zlashga tayyorlaning.



Said Ahmad 1920-yilning 10-iyunida Toshkent shahrining Samarqand darvoza mahallasida tug'ilgan. Uning bolaligi Oybek, G'afur G'ulom singari adiblar davrasida o'tdi. Tabiatan qiziquvchan, tinib-tinchimas Said Ahmad adabiyotga kirib kelguncha juda ko'p sohalarda o'zini sinab ko'rdi: plakatlar yozdi, artist bo'lishga urinib ko'rdi, doktorlik maktabida o'qidi, qurilish texnikumida tahsil oldi, rassomlik maktabiga qatnadi, mashhur suratkash Pensonga shogird tushdi. U o'zini adabiyotda topdi. Adib "O'zbekiston xalq yozuvchisi" unvoniga sazovor bo'lgan. "Do'stlik", "Buyuk xizmatlari uchun" ordenlari bilan taqdirlangan.



Mening bolaligim

Said Ahmad

Sizning yoshingizda men juda kam uxlardim. Ayniqsa, yoz kechalari charaqlagan osmonga qarab yotardim.

Mana shu miltirab turgan yulduzlarning narigi tomonida qanaqa joylar bor ekan, deb o'ylardim. Tezroq katta bo'la qolsam-u, dunyodagi jami sirlarni bilib ola qolsam, derdim. Samarqand darvoza guzari shundoqqina uyimizdan ko'rinib turardi. Yozi

bilan to'rt-besh marta dorbozlar kelishardi. Ularning o'yinlarini ko'rib, birdan dorboz bo'lgim kelib qoldi. Bog'imizdagi terakka arqon tortib, langar cho'p bilan chiqishini mashq qila boshladim. Yiqilib, qo'lim sindi. Bir oy o'ng qo'lim taxtakachlanib, azob tortganman. Shunda ham tavba qilmay, yana mashq qila boshladim. Yana yiqilib, chap qo'lim ham sindi. Ana shundan keyin dorbozlikdan aynib, rassomlikka qiziqib ketdim.

Bayram arafasida xo'jaliklardan maktabga kelib, albomlar tashlab ketishardi. Darsdan keyin to qorong'i tushguncha shior yozardim. Yangi tashkil bo'lgan muassasalarga nomlari bitilgan lavhalar yozganman. Bu orada arab alifbosi tugatilib, lotin alifbosiga ko'childi. Endi shiorlarni, nomlari bitilgan lavhalarni qaytadan lotin alifbosida yoza boshladim. Har xil suratlar ishlab, gazetaga olib boraman. Ba'zilarini "Rassom Saidahmad asari" deb chiqaradigan bo'lishdi.

Fotosuratlashlikka ishqim tushdi. Fotoapparat sotib oldim. O'zim o'rganib olanimdan keyin "Yangi hayot" maktabida fototo'garak ochib, bolalarni o'rgata boshladim. Gazetalarda "Saidahmad fotosi" chiqa boshladi.

Rassomlik bilan suratkashlik bahona bo'ldi-yu, matbuotga yaqinlashdim. Qo'lda chizgan rasmlarim, fotosuratlarimga aloqador xabarlarni o'zim yoza boshladim. Hamon o'sha paytda olgan qalamimni qo'ldan qo'ymadim. Ko'plab hikoyalar, romanlar,

pyesalar, kinossenariylar yozdim. Nimaiki orzu qilgan bo'lsam, hammasiga erishdim. Mabodo taqdir meni o'sha sakkiz yoshimga qaytarsa, baribir yana xuddi shu ishimni davom ettirardim. Chunki adabiyot va san'at qon-qonimga singib ketgan. O'z kasbimni jon-jonimdan yaxshi ko'raman.



1. Hikoya kimning tilidan aytilgan?
2. Qahramon yoshligidan nimalarga qiziqqan ekan?
3. Asardagi birinchi gapni o'qing. Gapda muallif necha yoshdaligini nazarda tutgan deb o'ylaysiz?
4. Said Ahmad o'zini qaysi sohalarda sinab ko'rgan?
5. Sizning qanday orzularingiz bor?
6. Orzularingiz ro'yobga chiqishi uchun qanday yo'l tutish kerak deb hisoblaysiz?



langar cho'p – dorda muvozanatni saqlash uchun dorboz qo'lda tutadigan yo'g'onroq uzun tayoq



- Hikoyani qismlarga bo'ling.
- Muallif qiziqishlari bayon etilgan gaplarni hikoyadan topib o'qing.
- Hikoyadan uning asosiy g'oyasi ochib berilgan qismini topib o'qing.



Hikoyaning shaxsini o'zgartirib, qayta so'zlab bering.



Atoqli o'zbek shoiri Hamid Olimjon Jizzax viloyatida tavallud topgan. Yoshligidan onasi Komila aya va bobosi Mulla Azimdan ko'plab xalq ertaklari, doston va qo'shiqlarni tinglab ulg'aygan. Hamid Olimjon gazeta va jurnallarda jurnalist va muharrir sifatida ishlagan, shu bilan birga

ijodiy faoliyatini ham davom ettirgan. U baxshilar ijrosidagi dostonlardan ilhomlanib, "Oygul bilan Baxtiyor", "Semurg" kabi yirik asarlar yaratadi.



Ertaklardan olingan so'zlar qatorida qaysi so'z ortiqcha ekanini toping.

o'gay

mehnatsevar

erka

sandiqlar

kulol

tanga

boy

dehqon

malika

laylak

laylak

kampir

cho'pon

tanga

dasturxon

quyon

ayiq

sher

bobo

bo'g'irsoq



Oygul bilan Baxtiyor

Hamid Olimjon

Dostondan parcha

Bolalik kunlarimda,
Uyqusiz tunlarimda,
Ko'p ertak eshitgandim,
So'ylab berardi buvim.

Esimda o'sha damlar: .
O'zi uchar gilamlar,
Tohir-Zuhra, Yoriltosh,
Oyni uyaltirgan qosh.

O't bog'lagan qanotlar,
Beqanot uchgan otlar.
Baxtiyor bilan Oygul,
Qiz bo'lib ochilgan gul.

So'ylaguvchi devorlar,
Bola bo'p qolgan chollar.
Buvimning har qissasi,
Har bir qilgan hissasi

Fikrimni tortar edi,
Havasim ortar edi.
Tinglar edim betinim,
Uzun tunlar yotib jim.

Seza olardim kuchin,
Ko'pi yolg'on, ko'pi chin.
Ammo Oygul-Baxtiyor
Ertagini u takror
Qilar edi har kechin...





1. She'r kimning tilidan aytilgan?
2. Shoir bolalik kunlari haqida nimalarni esladi?
3. Buvisi aytgan ertaklarning qanday alohida jihatlarini esga oldi?
4. *"Seza olardim kuchin, ko'pi yolg'on, ko'pi chin"* misrasini qanday tushundingiz?
5. Siz bobo-buvilaringizdan eshitgan qanday ertaklarning nomini ayta olasiz?
6. Nima deb o'ylaysiz, nima uchun kichik yoshdagi bolalarga ertaklar ko'p aytib beriladi?



Doston bu – liro-epik janrdagi badiiy asar. O'zbek xalq og'zaki ijodi va o'zbek mumtoz adabiyotida keng tarqalgan. Dostonda muayyan voqea hikoya qilinadi. Undagi voqea keng ko'lamda bo'lib, bir yoki ikkita bosh qahramon ishtirok etadi, personajlar esa ko'p bo'ladi.



Hikoyani qismlarga bo'ling.
Muallifning qiziqishlari bayon etilgan gaplarni o'qing.
Hikoyadan uning asosiy g'oyasi ochib berilgan qismini topib o'qing.



She'rni ifodali yod oling.



1. Siz nimaga qiziqasiz?
2. Maqsadga erishish uchun nima qilish kerak deb hisoblaysiz?



“Maqsadiga erishgan bolalar”
audiomatnini diqqat bilan tinglang.

2






Chet el kompozitorlari ichida yoshligidan butun dunyoga mashhur bo'lgan kompozitor avstriyalik Volfgang Amadey Motsartdir. U 1756-yil 27-yanvarda Avstriyaning kichik bir shaharchasi bo'lmish Zalsburgda saroy kompozitori organchisi Leopold Motsart oilasida dunyoga kelgan.

Motsartning musiqaga bo'lgan qobiliyati 3 yoshidan boshlab yaqqol sezila boshlagan. U klavesinda soatlab shug'ullanar, opasi 8 yoshli Annaning chalgan kuylarini bir eshitishda xatosiz aynan qaytarib chalib bera olardi.

Otasi Leopold o'g'lining musiqiy qobiliyatiga tan beradi va Volfgang bilan ham astoydil shug'ullana boshlaydi. Volfgang Motsart 6 yoshida klavesinda yaxshi chala oladigan darajaga erishadi va birinchi asarini, kichik hajmdagi pyesalarini yoza boshlaydi.

Yetti yoshga kirganda Motsart opasi, 12 yoshli Anna bilan birgalikda Fransiya qirolining qarorgohi – Versal saroyida konsert berishadi.





1. O'rgangan matnlaringiz kimlar haqida ekan?
2. Nodirbek Abdusattorov qanday yutuqlarga erishgan?
3. Uning shaxmatga qiziqishiga nima sabab bo'lgan?
4. Nodirbekning birinchi shaxmat murabbiysi kim edi?
5. Katta yutuqlarga erishish uchun nima qilish kerak deb o'ylaysiz?
6. Wolfgang Amadey Motsart kim bo'lgan?
7. Uning qobiliyati haqida qanday ma'lumotlarni eslab qoldingiz?
8. Motsart qanday yutuqlarga erishgan?



Quyidagi ma'lumotlar qaysi qahramonga tegishli ekanini ayting.

1. 2017-yilda dunyoning eng yosh grossmeysteri deya e'tirof etilgan.
2. 2021-yilda tezkor shaxmat bo'yicha jahon chempioni bo'lgan.
3. Uning musiqaga bo'lgan qobiliyati 3 yoshidan boshlab yaqqol sezila boshlagan.
4. Birinchi ustози – Ravshan Shukurov undagi qobiliyatni rivojlantirdi, maksimal darajada qo'llab-quvvatladi.
5. Otasi o'g'lining musiqiy qobiliyatiga tan beradi.
6. Har kuni 12 soatlab mashq qildi va yuqori marralarni egalladi.

7. 6 yoshida klavesinda yaxshi chala oladigan darajaga erishadi va birinchi asarini, kichik hajmdagi pyesalarini yoza boshlaydi.
8. U klavesinda soatlab shug'ullanar, opasi 8 yoshli Annaning chalgan kuylarini bir eshitishda xatosiz, aynan qaytarib chalib bera olardi.



Qadimda hindlar to'rt kishi ishtirokida o'ynaladigan "chaturanga" o'yinini o'ynaganlar. Har bir ishtirokchining figuralardan tashkil topgan o'z armiyasi bo'lgan. Figuralar sakkizga sakkiz o'lchamli kvadrat doskaning to'rt tarafiga qo'yilgan. O'yinchilar bir-birlariga qarshi o'ynashgan. Figuralar ma'lum qoida bo'yicha harakatlangan. Kimki raqib figuralarni yutsa, u o'yinda g'olib bo'lgan.

Keyinchalik bu o'yin Arabistonning sharqiy qismida ham ommalashgan. O'yin qoidalariga bir qancha o'zgartirishlar kiritilgan. Bu yerda ushbu o'yin "shatranj" nomini olgan. Vaqt o'tib, bu o'yinni forslar ham o'ynay boshlaganlar. Aynan forslar o'yinga siz va biz bilgan "shaxmat" nomini berishgan. Shaxmat so'zining ma'nosi – "shoh mot", ya'ni "shoh mag'lub bo'ldi", degan ma'noni anglatadi.

Klavesin – klavishli torli-tirnama musiqa cholg'usi. XVI asrdan beri ma'lum. Hozirgi fortepiano (royal)ning o'tmishdoshi. Unda jahonning mashhur kompozitorlari yuksak badiiy asarlar yaratishgan. Angliya, Fransiya, Italiya klavesin maktablari yuzaga kelgan. XVIII asr oxiridan klavesin o'rnini fortepiano egalladi. Lekin XX asr boshidan klavesin hamda aynan uning uchun mo'ljallangan musiqaga yana qiziqish tug'ilib, u ba'zi cholg'u ansamblari hamda orkestrlar tarkibiga kiritildi.



Rasmlarga qarang va ortiqcha musiqa cholg'u asbobini toping. Tanlovingizni izohlang.



“Mening maqsadim” mavzusida matn yarating.



Kundalik hayotimizda rassomlarning ishlarini qayerlarda uchratishimiz mumkin?



Rassomning yuksalishi

Siz sevib tomosha qiladigan “Oppog’oy va yetti gnom”, “Bembi”, “Mikki Maus”, “Uyqudagi malika”, “101 dalmatin” va boshqa “Walt Disney Pictures” kompaniyasining multfilmlari taniqli amerikalik

kinorejissor-multiplikator, rassom va prodyuser Uolt Disneyga tegishlidir. U 1901-yil 5-dekabr kuni AQShning Chikago shahrida dunyoga kelgan. Uning bolaligi baxtsiz hodisalar, ko'ngilsiz voqealar ichida o'tgan. Shunday damlarda onasi o'g'lini g'aroyib ertaklar aytib ovutardi. Ehtimol, shuning uchun ham Uolt sirli sarguzashtlar o'lkasiga kirib borgandir. U 12 yoshidan boshlab turli xil ertaklarga rasmlar, karikaturalar chizib, jurnal va gazeta tahririyatlariga olib boradi. Afsuski, bu mashqlarni birorta tahririyat qabul qilmaydi. Uning keyingi urinishlari ham besamar bo'lgach, u taqdirga tan berib, do'sti bilan hamkorlikda biznes boshlaydi. Bu unga yashash uchun yetarli daromad keltiradi. Ammo u sevimli mashg'uloti, karikaturalar chizishni davom ettiraveradi. Uning birinchi "Alisa mo'jizalar mamlakatida" nomli multiplikatsion asari muvaffaqiyatsizlikka uchraydi. Ammo bu Uoltning ruhini tushirmaydi. Aksincha, yanada ko'proq mehnat qilishga undaydi. Shu tariqa Mikki Maus, Donald Dakk, Guffi Dog kabi obrazlar dunyoga keldi. Bu qahramonlarni esa hamma birday yoqtirib qoldi. Endi butun dunyo ushbu obrazlarni sevib tomosha qilar, e'tirof etardi. Sevimli multiplikator 65 yillik umri davomida 29 marta "Oskar" mukofoti hamda 700 dan ortiq mukofot bilan taqdirlangan.

("Gulxan" jurnalidan)



1. Asar kim haqida ekan?
2. Asar qahramoni haqida qanday ma'lumotlarga ega bo'ldingiz?
3. Uning o'z maqsadiga erishishiga nima sabab bo'lgan deb hisoblaysiz?
4. Sizga qaysi multfilm qahramonlari yoqadi? Nima uchun?
5. Agar siz multfilm yaratsangiz, u nima haqida bo'lar edi?
6. Asar nima uchun bu bo'limda berilgan?



karikatura – tasviriy san'at turi, hajviy va kulgili qilib ishlangan rasm



● **Berilgan parchani o'qing. Uni davom ettiring.** Uning bolaligi baxtsiz hodisalar, ko'ngilsiz voqealar ichida o'tgan. Shunday damlarda onasi o'g'lini g'aroyib ertaklar aytib ovutardi.

● **Berilgan parchadan oldingi voqeani so'zlab bering.**

Sevimli multiplikator 65 yillik umri davomida 29 marta "Oskar" mukofoti hamda 700 dan ortiq mukofot bilan taqdirlangan.

● **Asar qahramoniga tavsif bering.**



"Mening multfilmim" mavzusida kichik matn tuzing.

Bo'lim yuzasidan takrorlash



1. Bo'limdagi asarlarni birlashtiruvchi asosiy g'oya nima?
2. "*Bola boshidan*" deganda nimani tushunasiz?
3. Sizga bo'limdagi qaysi asar ko'proq yoqdi? Nima uchun?
4. Asarlarni o'rganish jarayonida qanday ibrat oldingiz?
5. Bu bo'limni yana qanday nomlagan bo'lardingiz?



Har bir ustundagi so'zlardan mosini tanlab olib, maqollar tuzing va mazmunini izohlang.

Daraxt

yo'q

izlaganini

bor

Qunti

bir

baxti

ko'karar

Ahdi

quvlagan

joyda

qurolmas

Iz

borning

qo'ra

yo'liqar

Yo'l

yurgan

xazinaga

topar



Tursunboy Adashboyevning she'riy topishmog'ini o'qing va javobini toping.

O'ng'or tog'da

O'n kaptar.

Yovvoyiroq,

Jo'n kaptar.

O'ttiz uchta

Bolasi.

Donlar o'n uch

Qorasi.

To'qqiztasi olmay tin,

Silab-siypar

Qanotin.

Uxlar qancha

Polapon?

O'ylab ko'rgin,

Bolajon.



Berilgan bo'g'inlardan oldin va keyin shunday bo'g'inlar qo'yingki, natijada ikkita so'z hosil bo'lsin.

bo

la

gan

mat

da

som

mon


cha



Bo'lim mavzusiga mos asar toping.

Uni o'qib, do'stlaringiz bilan o'rtoqlashing.

III bo'lim. Oila – kichik Vatan





Qatorni davom ettiring:

Ona, validam;

Ota, _____ ;

Bobo, _____ ;

Buvi, _____ ;

Bola, _____ .



Bog'bon va nihol

(Rivoyat)

Qadim zamonda bir bog'bon bo'lgan ekan. Ularning yakka-yu yagona farzandi bo'lib, juda tantiq ekan. Bog'bon bolasiga tanbeh bersa, xotini o'rta tushib: "Qo'yavering, katta bo'lsa, esi kirib qoladi", – der ekan.

Bog'bon xotining gapi xato ekanini tushuntirish uchun shunday yo'l tutibdi: bog'ga ikkita bir xil nihol ekib, ularga bir xil o'g'it solib parvarishlabdi. Lekin nihollardan birining ortiqcha shoxlarini kesibdi, ikkinchisiga esa umuman tegmabdi.

Oradan uch yil o'tibdi, nihollar daraxtga aylanib, meva beradigan payti kelibdi. Shoxlari kesib turilgan nihol baland va chiroyli daraxt bo'lib, mevalari ham ko'p ekan. Qaychi tegmagan niholning shoxlari esa har tomonga tarvaqaylab, qiyshiq bir daraxt bo'libdi.

Bir-ikki mevasi esa maydaligidan ko'zga tashlanmas ekan.

Bog'bon xotinini chaqirib, daraxtlarni ko'rsatibdi va tushuntiribdi: "Mana bu daraxtning ortiqcha shoxlarini kesib turganim uchun butun kuchi asosiy shoxlarga borib, serhosil bo'ldi. Bunisi esa o'z holiga tashlab qo'yganim uchun meva bermaydigan, foydasiz daraxtga aylandi. Uning ortiqcha shoxlarini endi kesgan bilan foydasi kam. To'g'ri parvarishni niholligida qilish kerak edi".





1. Rivoyat nima haqida?
2. Bog'bon nima uchun xotinining fikrini o'zgartirishga harakat qildi?
3. Nihol bilan bolaning qanday o'xshashligi bor?
4. Daraxt meva bermasligining sababi nimada? Uning bola tarbiyasiga bog'liqligi qanday?
5. Rivoyatdan qanday xulosa chiqarish mumkin?



tanbeh – nojo'ya xatti-harakat uchun berilgan ta'zir, ogohlantirish
tarvaqaylab – har tomonga yoyilib



- Rivoyat matnidan bog'bonning gaplarini topib o'qing.
- Bog'bonga ta'rif bering.
- Rivoyat mazmuniga mos maqol ayting.
- Rasmni ifodalovchi so'z qo'yib, maqollarni o'qing.



bilan



bilan



Keksalik –



Rivoyatni o'qing. Reja asosida qayta hikoya qiling.



Ortiqchasini toping.

Farzand, dilband, bola, keksa, o'g'il
Bobo, buvi, mo'ysafid, chol, keksa
Momo, buvi, kampir, keksa, bobo



Keksalarni hurmat qil

Miltiqboy Xonnazarov

Keksa kishilarni, bolam, hurmat qil,
Ular ni jon bolam, farishta deb bil.
Duosi ularning tuganmas boylik,
Senga so'rab turar bir umr sog'liq.

Ko'rganda ularning qo'lini olgin,
Ko'nglini ko'tarib, ahvolin so'rgin.
Ular ni taklif qilgin uyning to'riga,
Choy quyib uzatgin tolmas qo'liga.



Ma'nolar terib ol har bir so'zidan,
Nur yog'ilib turar ular yuzidan.
Nasihatin tinglab, aytganini qil,
Yovuzlik ildizin bitta qo'ymay yul.



1. She'r kimning nomidan yozilgan?
2. She'rdan keksalar haqida nimalarni bilib oldingiz?
3. Bobo-buvilarning yana qanday xislatlarini ayta olasiz?
4. *"Ma'nolar terib ol har bir so'zidan, Nur yog'ilib turar ular yuzidan"* misrasini qanday tushundingiz?
5. Muallif she'r orqali qanday g'oyani ilgari surgan?
6. Siz ham tengdoshlaringizga keksalarni e'zozlash haqida biror fikr ayta olasizmi?



She'ni ifodali o'qing.
She'r mazmuniga mos maqol ayting.



She'ning har bir to'rtligiga mos sarlavha toping.
Har bir topgan sarlavhangiz asosida partadoshingiz bilan suhbatlashing.
Suhbat asosida chiqargan xulosangizni ayting.



Rivoyatni o'qing. Reja asosida qayta hikoya qiling.



Topishmoqlarni toping. Topishmoq javoblaridagi so'zlarning birinchi bo'g'inlaridan so'z tuzing.

Ikki otim bor, bir-biridan chopag'on.

**O'quvchi to'plar,
O'qituvchi sochar.
Dangasa esa
Topolmay qochar.**

**Likopchanning akasi,
Oilaning kattasi
Palovto'ra joy olgan
Uning nomidir...**



“Oila baxti” arman xalq ertagini tinglang.

3





1. Ertakda qanday g'oya ilgari surilgan?
2. Aka-ukalarning nochor ahvolga tushishiga nima sabab bo'ldi?
3. Nima uchun aka-ukalarning ishi yurishmadi?
4. Tunda uchragan kishi haqida nima deyish mumkin?
5. Nima deb o'ylaysiz, nima uchun aka o'z ishini tashlab, baxt izlagani ketdi?
6. Ertakdan qanday ibrat olish mumkin?
7. Oila baxti deganda nimani tushunasiz?



Ertak qahramonlariga ta'rif bering.
Ertakni qismlarga ajrating. Har bir qismi uchun
reja tuzing.



- Ertak voqealarining ketma-ketligini aniqlab o'qing.
 - a. Abik ham bir qishloqqa borib, tegirmonchinikida ishlay boshlabdi.
 - b. Qachon qarasa, urishganlaring urishgan, hech aka-ukaga o'xshamaysanlar. Qoch oldimdan, men o'zim senlardan zo'rg'a qutuldim.
 - d. Tegirmonim bib-binoyi ishlab turgandi, sen kelding-u, buzildi-qoldi.

- e. Bog'bonlikni boshlabdi. Ish boshlashi bilan hamma mevalar to'kila boshlabdi.
- f. Bir zamonlar Abik ismli boy yashagan ekan.
- g. Iltimos, menga rahmingiz kelsin. Qish keldi, mening esa boradigan joyim yo'q.
- h. Abikning xosiyatsizligi haqidagi xabar hamma yoqqa tarqalib, hech kim uni ishga olmabdi.
- i. Abikning ko'ngli xotirjam tortib, uyquga ketibdi. Uy egasi uning oldiga kelib so'rabdi.
- j. Sen meni tanimaysan. Men shu xonadonni turli falokatlardan asrovchi baxti bo'laman.
- k. Kechasi sigirni poylab yotib, ko'zi ilinib uxlab qolibdi. Bir mahal turib qarasa...



Ertakni kelgan joyidan davom ettiring.



Ertak mazmuniga mos 3 ta savol tuzing.



Rasm asosida og'zaki gaplar tuzing.



Ota-ona qalbi, Ota-ona qadri

Po'lat Mo'min

Quyosh berar issiqlik, nur,
Deymiz hayot asosi.
Ota-ona juda aziz,
Quyoshga teng bahosi.
Ota-ona aytgan har so'z
Farzand uchun qarz-u farz.
Hech qayerda va hech qachon
Etmang dilin xijil, darz.
Bizlar uchun ayamaydi

Ular hatto nonini.
Ayamaydi, ayamagan
Hattoki o'z jonini.
Agar chiqsa issig'imiz,
Yonib ketar olovday.
Yuguradi tun-kun demay,
Shifokorga darrovda.
Yursa-tursa bizni o'ylar,
Quyosh qoyil ularga.
Yetkazishga urinadi
Bizni ilm-u hunarga.
Doim quloq tutish zarur
Ota-ona qalbiga.
Dil so'zimiz, – yetajakmiz
Ota-ona qadriga.
Ularning-chi, har doimo
Ko'ngli bo'lar bolada.
Bizlarning ham yosh ko'nglimiz
Bo'lsin ota-onada.



1. She'r nima haqida?
2. Nima uchun she'rda ota-onaning bahosi quyoshga tenglashtirilyapti?
3. She'rda ota-ona haqida qanday fikrlar aytilgan?
4. Siz ota-onangizga qanday munosabatda bo'lasiz?
5. Quyidagi satrlarni qanday tushundingiz?
*Ota-ona aytgan har so'z
Farzand uchun qarz-u farz.*



xijil – ko'ngil g'ashligi
darz – yorilgan




She'rni partadoshingiz bilan birga ifodali o'qing.
 Ota-onaga xos xislatlarni ayting.
 Ota-onani xursand qiladigan 3 ta gap ayting.
 She'r matnidan bitta harfni tushirib qoldirish yo'li
 bilan yangisi hosil qilinadigan so'zlarni aniqlang.

Namuna: qarz – arz, kun – un



Maqolni o'qing va mazmunini izohlang.



She'rni ifodali o'qing.



Maqolni davom ettiring.

Onaning ko'ngli ... ,
Bolaning ko'ngli

Maqolni o'qing va mazmunini izohlang.



Ona qarzi

(Hind xalq ertagi)

Rafiq degan bola bo'lgan ekan. Bir kuni u dadasining nimalardir yozayotganini ko'rib, qiziqib so'rabdi:

– Dada, nima qilyapsiz? Hadeb nimalarni yozyapsiz?

Dadasi shunday javob beribdi:

– Hisobotlarni to'ldiryapman, o'g'lim.

Rafiq hali kichkina bo'lgani uchun “Hisobot” so'zini tushunmas ekan.

– “Hisobot” nima degani, dada? – deb so'rabdi u.

– Hisobotmi? – debdi dadasi o'g'liga qarab. –

Buning ma'nosi shuki, men davlat ishini qilaman, qilgan ishim uchun davlat menga pul to'laydi. Lekin men qanday ishlar qilganimni, kimlarga qanday ishlar qildirganimni davlat qayerdan biladi? Shuning uchun

men falon-falon ishlar bajarildi, shu ishlar uchun menga falon rupiya miqdorida pul to'lanishi kerak, deb qog'oz to'ldiraman. Ana shu qog'oz "Hisobot" deyiladi.

Buni eshitib, Rafiqning dilidan shunday o'ylar kechibdi: "Dadam qilgan ishlari uchun davlatdan pul olar ekanlar, demak, men ham uyda qilgan ishlarim uchun oyimdan pul olishim kerak. Axir, ba'zida oyim kechalari ham ish buyurgan paytlari bo'lgan-ku?"

Shundan keyin Rafiq bir varaq qog'oz bilan ruchka olibdi-da, o'zicha shunday deb yozibdi:

"Oyimning Rafiqdan qarzi:

Oyim Rafiqdan quyida keltirilgan miqdorda pul qarz bo'lib, uni to'lab qo'yishi lozim:

Bir oyda ukamni ovqatlantirganim haqi – 1 rupiya 00 paysa,

Bir oyda do'kondan narsa xarid qilib kelganim haqi – 1 rupiya 00 paysa,

Bir oyda non keltirib berganim haqi – 0 rupiya 80 paysa,

Hammasi bo'lib, 2 rupiya 80 paysa bo'ladi".

Rafiq "Hisobot"ni oyisi qand-shakar saqlaydigan javon ichiga tashlab qo'yibdi. Ertasiga kelib o'sha joyni qarasa, pul yotibdi! Rafiq shosha-pisha pulni olibdi-da, sanab ko'ribdi. Roppa-rosa ikki rupiya sakson paysa. U o'zida yo'q suyunibdi. Suyunmay bo'ladimi? Bu yoqdan "Hisobot" yozdi, bu yoqdan mehnat haqi oldi. Lekin pul bilan birga oyisi bir

qog'oz ham qo'ygan ekan. Rafiq qog'ozni olib undagi yozuvni o'qiy boshlabdi:

“Rafiqning oyisidan qarzi:

Rafiq oyisidan quyidagi miqdorda qarzdor bo'lib, qarzini tezda to'lashi kerak:

O'n ikki yilgacha uni tarbiya qilish haqi – 0 rupiya 00 paysa,

O'n ikki yilgacha uni boqib, qornini to'yg'izish haqi – 0 rupiya 00 paysa,

O'n ikki yilgacha unga kiyimlar, sut, qatiq va boshqa mayda-chuydalar olib berish haqi – 0 rupiya 00 paysa,

Hammasi bo'lib, 0 rupiya 00 paysa”.

Rafiq hang-u mang bo'lib qolibdi. U yugurib borib, o'zini oyisining oyog'iga tashlab:

– Oyijon! Meni kechiring, ahmoqlik qilibman. Xato qilibman! – debdi yig'lamoqdan beri bo'lib. – o'ylab qarasam, bir zamonda bajargan xizmatimni ham minnat qilibman. Lekin siz ko'zimni ochdingiz, bo'ynimdagi sizning qarzingizni umr bo'yi ham to'lay olmayman. Uncha-muncha qilgan ishlarim esa, bu qarzning mingdan biriga ham arzimaydi.

Soddadil o'g'lining og'zidan bu gaplarni eshitib, onasi dil-dilidan suyunibdi va o'g'liga shunday debdi:

– O'g'lim, halol bo'l. Insofli bo'l, hech kimga yomonlik qilma. Rostgo'y bo'l. Birovlarning dilini og'ritguvchi dilozor bo'lma. Mening sendan tilagim shu.

Rafiq: “Aytgan gapingizdan chiqmayman, siz o‘ylaganday odam bo‘lishga harakat qilaman”, – deb oyisiga so‘z beribdi.



1. Ertak nima haqida ekan?
2. Ota va o‘g‘il nima haqida suhbatlashishdi?
3. Nima uchun Rafiq onasiga “Hisobot” yozdi?
4. Rafiqning *“Bo‘ynimdagi sizning qarzingizni umr bo‘yi ham to‘lay olmayman”*, degan fikrga kelishiga nima sabab bo‘lgan?
5. Siz onangizni suyuntirish uchun nima qilasiz?



rupiya – pul birligi



Ertakdan topib o‘qing:

1. Ota va bola suhbatini;
2. Rafiqning onasiga yozgan hisobotini;
3. Onasining yozgan gaplarini;
4. Rafiqning onasi bilan suhbatini.

Ko‘zimni ochdingiz, minnat qilmoq jumlarining mazmunini izohlang.

Fikrni davom ettiring: *Ona borki...*



Ertakni o‘qing va mazmunini so‘zlab bering.



Iste'dodli ijodkor Feruza Jalilova 1961-yilda Toshkent viloyatida tavallud topgan. Bolalar uchun "Mahallamiz bolalari", "Bolajon" nomli she'riy, "Mehr daraxti" kabi hikoyalar to'plami nashr qilingan.



"Tanlov" so'zining o'rniga yana qanday so'zni qo'llaymiz?



G'aroyib tanlov

Feruza Jalilova

Bir bor ekan, bir yo'q ekan. Qadimdamas, ayni kunlarda Toshkentning so'lim mahallalaridan birida Fotima va Zuhra ismli opa-singillar yashar ekan.

Fotima juda odobli, mehnatsevar qiz ekan. Ozoda kiyinar, xonasini sarishta tutar, o'yinchoqlarini o'ynab bo'lgach, javonga chiroyli qilib terib chiqar, bog'dagi rango-rang gul va rayhonlardan uzib, guldonga solib qo'yarkan. Sochlarini silliq tarab, chiroyli turmaklab yurarkan.

Singlisi Zuhra esa uning butunlay aksi bo'lib, besh yoshga kirsam ham erkalgini tashlay demas ekan. Opasi Fotimani sensirar ekan. Buvisi Zuhraga: "Fotima sendan katta, uni opa degin", – desa, "Uni opa desam, u ham meni opa desin", – deya qaysarlik qilar ekan. Oyisiga, ovqatimni yedirib qo'ying, deya xarxasha qilar, kiyimlarini tartibsiz yechib tashlar, sochlarini tarashga ham erinar ekan. Buvisi: "Yuz-qo'llaringni, tishlaringni yuvib kel", – desa, "Kecha yuvdim-ku", – deb turib olarkan. Xonasida shirinliklarning qog'ozlari, qo'l-oyoqlari singan, uzilgan o'yinchog'-u qo'g'richoqlar sochilib yotarkan.

Bir kuni buvisi qizlarni yoniga chaqirib, "Sarishta qiz" nomli tanlov o'tkazish niyatida ekanini aytibdi. Tanlov shartiga ko'ra kimning xonasidan ko'p chiqindi chiqsa, o'sha tanlov g'olibi bo'lar ekan.

Tanlov boshlanibdi. Buvisining ishorasi bilan opa-singil ishga kirishib ketishibdi. Zuhra bir zumda xonasidan bir chelak chiqindi yig'ibdi. Fotima quruq qo'l bilan chiqibdi va tanlov g'olibi bo'la olmasligidan



xafta bo'libdi. Zuhra esa xursand bo'lgancha buvisining uni g'olib deya e'lon qilishini kutib turibdi.

Lekin tanlov u kutgandek yakunlanmabdi. Buvisi Zuharani emas, Fotimani g'olib deb e'lon qilibdi.



1. Ertakdagi opa-singillar haqida nima deya olasiz?
2. Siz ularni qaysi ertak qahramonlariga o'xshatdingiz?
3. Sizningcha, nima uchun buvisi "Sarishta qiz" tanlovini o'tkazdi?
4. Nima uchun tanlov Zuhra kutganidek yakunlanmadi?
5. Buvisi nega bunday yo'l tutdi deb o'ylaysiz?
6. Asardan qanday xulosa chiqardingiz?



so'lim – go'zal



1. Fotima va Zuhraga ta'rif bering.
2. Fotima haqida aytilgan gaplarni topib o'qing.
3. Zuhra ta'riflangan gaplarni o'qing.
4. Asar mazmuniga mos reja tuzing.



Asar mazmunini qayta hikoya qilib bering.



Merosga kim munosib?

(Rivoyat)

Qadim zamonlarda mo'ysafid bo'lib qolgan badavlat otalardan biri voyaga yetgan besh o'g'lini yoniga o'tqizib, o'g'rilik, poraxo'rlik, kishi haqiga xiyonat, tuhmat qilish gunoh ekanini tushuntirib, bunga amal qilmaganlar jazoga tortilishi va merosdan mahrum qilinishini aytibdi.

Kunlar o'tib, farzandlarining halolligini sinab ko'rish niyatida o'g'illarini shahardan tashqariga sayilga olib chiqib, har yer-har yerga oltin solingan hamyonlarni tashlab qo'yibdi. Ayrimlari buni ko'rmagan bo'lsa, ko'rganlari, otam buni sinash maqsadida qilgan bo'lsa, ko'rib qolib merosdan mahrum etishi mumkin, deb olishga jur'at etmabdi.

Ammo kenja o'g'li hamyonni ko'rish bilan oq qo'lga olibdi-yu, atrofga olazarak ko'z yugurtiribdi. Hech kim yo'qligini sezgach, darhol ko'zdan g'oyib bo'libdi. Buni kuzatayotgan akalaridan biri o'z pokligini bildirish niyatida darhol otasiga bo'lgan voqeani ma'lum qilibdi. Bundan hayron bo'lgan ota sukutga tushibdi-yu, biror gap aytishga shoshilmabdi. Kechqurun o'g'illari jam bo'lib, voqeani surishtirayotganda, kenja o'g'il:

– Mening sizlardan ajralib, kech qolishimning boisi shuki, hamyon ichida oltin tangalar borligini ko'rishim bilan oq yo'qotgan odamning ahvoli, buni ne

mashaqqatlar bilan topib, ne niyatlarda yig'ganligi-yu, yo'qotgan chog'dagi nolalari xayolimga kelib, uni topish uchun odam izi tushgan tomonga yugurdim. Egasi chiqmagach, ko'pchilik orasida bir faqirga xayr qildim, – degan javobni aytibdi. Buni eshitgan ota:

– Barakalla, ofarin, butun meros senga, – deganda, katta o'g'il:

– Ota, axir, bu insofdan emas-ku! Yerdagi hamyonni men ham ko'rgan edim, lekin birovning haqi menga harom deb olmagan edim! Meros menga bo'lmay, nega bunga bo'ladi? – debdi. Shunda ota:

– Sening olmasliging birovning haqidan qo'rqishing, rahm-shafqat, halollikdan emas, olganimni kimdir ko'rsa-yu, bundan otam xabar topsa, merosdan mahrum qiladi, degan hisdan tug'ilgan. Kimdandir qo'rqib, jinoyat qilmaslik bu poklikdan emas. Ukangning qilmishi esa qonuniy jazodan qo'rqqanligidan emas, ichki e'tiqoddan, insonlarga bo'lgan mehrdan, – deb javob bergan ekan...





1. Rivoyat nima haqida ekan?
2. Mo'ysafid o'z o'g'illariga qanday shart qo'yibdi?
3. U o'g'illarini qanday yo'l bilan sinadi?
4. Kenja o'g'il hamyonni topib olgach, qanday yo'l tutdi?
5. Sizningcha, otaning qilgan ishi to'g'rimi?
Fikringizni izohlang.



ko'zi olazarak – ko'zi besaranjom, alang-jalang



Ota va o'g'il suhbatini rollarga bo'lib o'qing.
Rivoyat qahramonlari haqida fikringizni ayting.
Rivoyatdagi asosiy g'oyani 2 ta gap bilan bayon qiling.

Ertakdagi ijobiy va salbiy xislatlarni ajrating.
Rivoyat mazmuniga mos reja tuzing.

Maqollarni rivoyat mazmuniga bog'lang.

1. *Dili pokning ishi pok.*
2. *Tekin topgan mol yomon,
Oxiri qo'ymas omon.*
3. *Ota-ona duosi
O'tga, suvga botirmas.*



**Rivoyatni o'qing va mazmunini
sharhlab bering.**

Bo'lim yuzasidan takrorlash



1. "Oila" so'ziga qanday ta'rif berasiz?
2. Nima uchun "Oila – kichik Vatan" hisoblanadi?
3. Bo'limda o'rgangan asarlaringizdan qanday xulosa chiqardingiz?
4. Sizga bo'limdagi qaysi asar yoqdi?



Rollarga bo'lib o'qing.



Onalik mehri

Samandar Vohidov

- Sendan yuksak nima bor, yulduz?
- Onalik mehri.
- Sendan keskir nima bor, olmos?
- Onalar qadri.
- Qaydan olding otashni, quyosh?
- Ona qalbidan.
- Po'lat, qaydan senda zo'r bardosh?
- Ona sabridan.
- Senmi, ko'klam hayotbaxsh fasl?
- Yo'q, ona izi.
- Senmi totli, shifobaxsh asal?
- Yo'q, ona so'zi.

- Sendan shaffof ne, tonggi ziyo?
- Ona boqishi.
- Yaratuvchi senmi, tabiat?
- Yo'q, yo'q onalar.
- Baxt beruvchi senmi, hayot?
- Yo'q, yo'q, onalar.

- Savollarga berilayotgan javoblarni izohlang.
- Siz bu savollarga yana qanday javob bergan bo'lardingiz?



So'zlarni o'z o'rniga qo'ying va Alisher Navoiyning hikmatli so'zini o'qing.

“Eng kishining burchlaridan muhim biri – hurmati ota-ona”.



“Mening oilam” mavzusida matn tuzing.



Videoni tomosha qiling.

Undan qanday yangi ma'lumotlarni bilib oldingiz?

Oilangizda Navro'z qanday nishonlanishi haqida gapirib bering.



Mundarija

I bo'lim.

| | |
|---|----|
| Tabiatni asraylik | 3 |
| 1-mavzu. Tabiat zanjiri | 4 |
| 2-mavzu. Tabiat – bebaho ne'mat | 8 |
| 3-mavzu. Nega? <i>Zahro Hasanova</i> | 11 |
| 4-mavzu. O'q. <i>Hamza Imonberdiyev</i> | 14 |
| 5-mavzu. Daraxtlar – tabiat mo'jizasi | 17 |
| 6-mavzu. Orolim. <i>Rauf Tolib</i> | 20 |
| 7-mavzu. Tabib ko'klam. <i>Rauf Tolib</i> | 23 |
| 8-mavzu. Bo'lim yuzasidan takrorlash | 25 |

II bo'lim.

| | |
|---|----|
| Bola boshidan | 27 |
| 9-mavzu. Porloq yulduz. <i>Tamila Qosimova</i> | 28 |
| 10-mavzu. Abu Rayhon Beruniy. <i>Pirmat Shermuhammedov</i> | 31 |
| 11-mavzu. Va'da. <i>Xurshid Davron</i> | 34 |
| 12-mavzu. Mening bolaligim. <i>Said Ahmad</i> | 37 |
| 13-mavzu. Oygul bilan Baxtiyor. <i>Hamid Olimjon</i> | 41 |
| 14-mavzu. Maqsadiga erishgan bolalar. | 43 |
| 15-mavzu. Rassomning yuksalishi | 49 |
| 16-mavzu. Bo'lim yuzasidan takrorlash | 52 |

III bo'lim.

| | |
|--|----|
| Oila – kichik Vatan | 54 |
| 17-mavzu. Bog'bon va nihol. <i>Rivoyat</i> | 55 |
| 18-mavzu. Keksalarni hurmat qil. <i>Miltiqboy Xonnazarov</i> | 58 |
| 19-mavzu. Oila baxti | 60 |
| 20-mavzu. Ota-ona qalbi, ota-ona qadri. <i>Po'lat Mo'min</i> | 63 |
| 21-mavzu. Ona qarzi. (<i>Hind xalq ertagi</i>) | 66 |
| 22-mavzu. G'aroyib tanlov. <i>Feruza Jalilova</i> | 70 |
| 23-mavzu. Merosga kim munosib? <i>Rivoyat</i> | 73 |
| 24-mavzu. Bo'lim yuzasidan takrorlash | 76 |

Darslik holati haqida ma'lumot

| N ^o | O'quvchining F. I. Sh | O'quv yili | Darslik olingan vaqtdagi holati | Sinf rahbarining imzosi | Darslik qaytarib berilgan vaqtdagi holati | Sinf rahbarining imzosi |
|----------------|--------------------------|---------------|--|-------------------------------|---|-------------------------------|
| 1 | | | | | | |
| 2 | | | | | | |
| 3 | | | | | | |
| 4 | | | | | | |
| 5 | | | | | | |
| 6 | | | | | | |

Darslikni olish va o'quv yili oxirida uni qaytarishda yuqoridagi jadval sinf rahbari tomonidan quyidagi mezonlarga muvofiq to'ldiriladi

| | |
|------------|--|
| Yangi | Darslikning holati a'lo darajada |
| Yaxshi | Muqovasi butun, kitobning asosiy qismidan uzilmagan. Barcha sahifalar mavjud, butun, yirtilmagan, yelimi ko'chmagan |
| Qoniqarli | Muqovasi ezilgan, shikastlangan, kitobning asosiy qismidan qisman ajralgan va foydalanuvchi tomonidan tiklangan. Qayta tiklash ishlari qoniqarli. Yirtilgan sahifalar yopishtirilgan, ba'zi sahifalari yirtilgan |
| Qoniqarsiz | Muqovasiga chizilgan, kitobning asosiy qismidan to'liq yoki qisman yirtilib, uzilgan, qoniqarli tiklangan. Sahifalari yirtilgan, ba'zi sahifalari yo'q, bo'yalgan, ifloslangan, tiklash mumkin emas |

Aydarova Umida Baxtyarovna
Azizova Nodira Kudratullayevna

O'qish savodxonligi

3-sinf

III qism

Umumiy o'rta ta'lim maktablari uchun darslik

“Novda Edutainment”

Toshkent – 2023

Muharrir
Badiiy muharrir
Musahhih
Rassomlar:
Kompyuterda sahifalovchi

*M. Nishonboyeva
A. Sobitov
X. Serobov
V. Frolov, R. Ismailova, T. Daminov
Sh. Axrarova*

Nashriyot litsenziyasi AI №158. 10.08.2023-yilda original-maketdan
bosishga ruxsat etildi. Bichimi 70×100/16. Kegli 16 n/shponli.

“Arial” garniturası. Ofset bosma usulida bosildi.

Mashinada yengil bo'rlangan (Machine Finished Coated) 80 g/m2 qog'oz.

Shartli b.t. 5,5. Hisob-nashriyot t. 0,8.

Adadi 626 983 nusxa. Buyurtma raqami 23-609.

“O'zbekiston” NMIUda chop etildi.

